

方山薛先生全集

方山先生全集卷之五十三

公移七

慈谿縣行

曉諭齊民

照得慈谿爲縣素稱文獻絃歌比屋章甫滿朝誌載其勤穡力本尚禮好文王介甫亦謂慈谿小邑其俗一而不雜其人畏刑而易治但世降俗末則有不盡然者今欲啓迪其本心復還其舊俗愚雖不敏竊有志焉昔程明道爲晉城令嘗謂圖治於長久者雖聖賢爲之且不能倉卒苟簡而就蓋必本之人情而爲之法度紀綱條教必審定而後下本職菲薄叨領是

邑蒞政甫及四月兢業實有百端民情事體固未周  
悉而誠心直道則不敢欺敬述數條與吾民約之於  
始而慎之於終不能以身先而徒以言教自反之下  
固有愧焉惟願吾民相與體之

一民間有孝敬父母友愛兄弟親厚宗族和睦鄉里  
具有實跡者本職訪知量加優賞

一懷才抱德守正特立之士高蹈山林不識官府真  
足以表正鄉閭輓回風俗者本職自當造訪請教

一冠婚喪祭俱當以朱子家禮爲則有患疾病者止  
宜延醫服藥並不得用師巫邪術

一年高有識者知民間疾苦有司所當就問本職到任之初亦欲禮待一二將倣橫渠月吉具酒食於庭親爲勸酬之禮奈民心不古輒有要求自取薄待從今以後切宜戒之

一在學生員及儒士民生果有能潛心大業奮志六經以古豪傑自期者本職亦願相與講明討論若徒務口耳眩飾觀聽者不必相聞

一本縣人民多有宗族相殘兄弟告訐或同居共戶而稱爲世讐或小嫌私忿而構成大獄或捏詞誣牒而徑赴上司或旁引曲證而牽連累月今後務宜平

心自反深思是非利害各宜含忍况一人繫獄舉家不安而陟虛招誣罪且不免只此一事已屢經告示若再不相體必置之法

一白蓮無念等社及婦人入寺觀燒香亦屢行禁約敢有犯者許諸人拿送到縣以憑問擬如律其里老隣佑人等互相客隱事發一體治罪

一民間各樣生理皆可營爲過活况本縣爲東南文獻之邑尤當慎於擇術奈何蔽風相沿游花子弟不務四民之業專一鳩集徒黨搬演雜劇粧出醜態務以悅人貽羞鄉黨取笑他邑傷風敗俗侈費耗財莫

此爲甚凡我良民宜自思之

一章服自有制度不容僭濫本縣人民或沽漿賣餅或守宿巡更輒戴角巾甚褻體統有紊觀瞻此皆本職所親見者今後務宜安分守禮犯者坐以違式罪名

一民間行使升斗秤尺務要較勘相同如有不依官法仍前有鄉斗官斗之名者定依私造律問擬其欺騙愚民者計贓從重究治

一凡偽造假銀行使及知情買使之人俱照例重治枷號不恕

一本縣境內祠觀寺廟但祀典縣誌所不載而私自  
修建者各該里老從實開寫修建年月呈報以憑議  
處

一鄉隅老人不許濫受詞狀覓詐民財其有官府批  
行及查勘等項必須從公着實將事情明白繳報毋  
得朦朧妄呈捏結自取罪戾

一都頭里長人等催辦糧料勾攝公務若依期完報  
隨即放回生理况事務在身不得推避何苦遲延耽  
悞致累官府督催自受杖責

一里長舊有饋送供辦常例盡行革去再不許指稱

衙門使用科歛甲首小戶

一在官糧長收頭解戶庫役人等多有侵欺錢糧問  
擬軍徒變賣家產監死刑獄累及官民禍延子孫者  
固是大姦大惡亦爲至蠢至愚中間無藉光棍恣意  
貪饕拚身亡命者固不足恤亦有計領官錢初欲經  
營以取利者不知錢一入手不免妄用途一散不能  
復聚卒至喪身亡家以貽無窮之患今後此輩務宜  
深思利害保重身家顧惜子孫無起妄念一遇徵收  
轉解務須刻期完事歸家生理以享安閒之福縱是  
貧窮多少自在凡我良民戒之慎之



一街市鄉村諸色牙行人等每月朔望投遞執結開報貨物時估貴賤價值不許把持行市多索牙錢攙截貨物做定價目欺騙鄉民違者定照喇唬例問擬軍發邊衛民發口外申詳發遣決不輕貸

一訪得永明寺前布市有等婁頭光棍專一行使假銀騙買鄉民布絹到手輒又截長扣短暗令黨類易敝衣破帽扮作鄉民騙賣與人展轉覓利本鄉小民異鄉遠客俱受其害許地方拿送究治

一徐家巷口平政橋竹巷口大方橋市心等處有號爲人王閣老學士主事提控處士等項名色八九成

羣在於東西二原嶺下夾田三板橋等處拋截鄉民魚蝦鱗蛤不容到縣自賣及至到手又塞泥拌土重等輕秤做定高價似此等項本卽拿問本職以父母之心姑許速改如再仍前縱惡罪在旦夕

一本縣豬行屠戶專一交通牙家行使七色錘沁九色印沁低銀及巧用蝦弓套頭攀紐扶幹綫錘長人矮人等項手法似此姦徒深爲可惡如再仍前不改事發定行重治

一本縣遇有發賣官塩及有巡獲私塩俱被積年慣弊鹽牙串通吏書撰捏鹽大戶名色示令坊里開報

誑騙民財今後俱發鹽行人編班領賣違者究治

一飲酒最能亂性害事大禹聖人必惡旨酒成周盛時羣飲者殺本縣人民率多好飲雖至縣庭猶乘醉妄言甘心受責推原其故皆因酒肆過多便於沽飲今後縣前直街左右止許賣飯以便鄉民不許鋪設酒殺誑誘民財荒廢事務如有犯者著地方總甲送縣懲治

一山鄉居民砍伐柴薪抵載出賣多被光棍把持任意喝騙今後照依時價聽其自買自賣不許仍前恃強抑勒

一養濟院本以收養無告窮民先前里老受財輒將壯健得過人戶冒支官糧本縣已行審革姑且免行追究今後務要從實開報必使澤及窮民

一凡陂塘溝渠水利所在官民田畝賴以灌溉不許豪民侵僭自用或壅或瀉以爲民患其海堤去處尤當修防無得走泄水勢崩潰堤岸

一代人捏寫詞狀教唆扛幫者許各該地方人等指名呈告照例重治

一民間有等姦徒因告爭他人田土不遂輒朦朧捏寫契書投獻勢家其家人一時昧於理法收留僭種

者容或有之如仍前不行改正者本職雖懦弱亦當  
追究並擬如律

一訪得本縣多有外里移民或躲避軍匠或畏懼差  
徭流移居住不務本等營生縱容妻小爲娼往來酒  
肆誑誘良家子弟爲害不小着坊長總甲人等責令  
各歸鄉里本業營生敢有容隱者究問不貸

一聞得本縣盜賊自來稀少近來時或竊發不可不  
嚴爲之防各地方該舖總小甲火夫人等遇夜各要  
巡警提更唱號以防一切不測之事其常設民壯弓  
手巡捕官并兩巡檢司務選年力精壯通曉技藝者

充當分派各該緊要地方巡視并隅都里老總甲人等務要盤詰異言異服面生可疑之人不得入境其民家客店如遇投宿客人俱要附寫姓名籍貫來歷明白每月朔望開報送縣以憑稽考

一民間但有孝不悌不睦九族欺虐鄉里者許里老人等指名具報以憑懲治

一有不務生理專一三五成羣賭博撒潑夜聚曉散誘害良家子弟者俱照律例問擬枷號痛治不宥

一前項禁約止具畧節曉諭吾民使知所趨避倘自今以往雖平日有過者若能悔悟遷善即係良民本

職決不追念舊惡其縱恣不悛者明憲典章昭布森列本職亦不能汝貸矣

勸諭僚屬

照得縣設令長佐以承簿而幕職次之上下相維彼此聯屬無非欲其協恭和衷承流宣化以安此下民也本職迂疎謬長茲邑蒞任以來夙夜戰兢惟恐得罪於上下尚賴一二僚屬矢心戮力助其不及爲此揭數言於堂朝夕觀省更願吾儕相與勉之

計開

一吾人之一心萬事之本存心一公則天理流行而

事事物物各有條理設施措置自無不當昔人所謂  
與同僚待羣吏愛百姓處官事與夫曰清曰慎曰勤  
者總不外此而得其諸毀譽得失皆非所計而心逸  
日休矣富貴受用曾有過於此者乎存心一私則人  
欲縱恣而事至物來別生意見顛倒錯亂無所不至  
昔人所謂所得甚少而吏人所盜不貲與夫塗擦文  
字追改日月重易押字萬一敗露得罪反重者亦不外  
此而得其諸人非鬼謫皆所不免而心勞日拙矣虧  
體辱親又曾有過於此者乎

一私欲生於形氣極易縱恣如火斯熾撲滅甚難程



伊川謂今令與簿不和只是爭私意良有以也但於平旦清明之時燕居獨處之際試平心易氣思之天下之人多少長材大器不得一官半職埋沒草莽粗衣糲食甘心賤貧自反諸身亦無以大過於彼而獨得居官食祿冕服乘軒比上不足比下有餘矣何苦不自足而必求逞其欲耶况欲不可逞而羞辱隨之將爲身計而身不可保將爲子孫計而子孫未必能守作善降祥作不善降殃天道神明毫髮不爽以此思之則如水制火人欲日消而天理可復矣

一 朝廷任官三途金用由貢而馳轂於部院者見

今不止一人其援例入監而仕至京堂或三考出身而官居高品者亦往往有之事在人爲何曾限定此固慕外之心固不當立但諸君恐有以資格自委者敢就以此相告縱使美職不可必得然肯勵志做一好人存心愛物於人有濟其勝於美職多矣

### 勸諭學校

照得本縣山川孕靈人文丕著信兩浙之名邦東南之才藪也本職蕪陋叨今茲縣每至學宮輒見冠裳濟濟議論有章及考其文又皆崇經黜子尊王賤霸渾厚爾雅英華暢達雖言人人殊而同歸於道甚愜

素望心竊慶之夫有士如此而僅望以高科大拜是  
淺之乎爲待矣故願諸賢敦本尚實心解力行然其  
所以爲之者亦不湏再假詞說反求諸本心而質之  
於六經四書當自得之矣豪傑之士不待吾言而好  
爲人師吾所不敢但其間亦或有安於習俗而相接  
之際甚駭觀瞻故不得不直言相告此固諸賢性分  
之所當盡而不敏忝爲提調亦職分之所當爲也自  
今以後其上焉者爲學之方自有成法願益加懋勉  
其次焉者縱使無志於聖賢亦當求異於市井凡  
卧碑 勅諭及提學道教條均望時一省覽其縣

一二瑣屑事體併附列以告亦願相與體之爲此開  
關本縣煩爲轉行儒學揭示施行

計開

一易曰天與水違行訟君子以作事謀始夫始之不  
慎訟之所由起也學者果能見幾識微使不至於訟  
而橫逆之來又能含情忍性則日漸月摩而齊民化  
之亦將無好爭訟矣此陳寔居鄉訟者恐爲所短而  
敢爲不善者亦不欲使王彥方知也今慈民好訟咎  
在不敏而士居民先轉移之機亦竊有望故願諸賢  
協力匡助其諸賢有必不得已決欲興訟者請具詞

於本學掌教司訓先生公同驗過收候五日一次類  
送本縣自當依法施行則士人不類於凡民儒衣不  
混於囚服而於訟之中亦庶幾有復命安貞者矣  
一表記曰君子不失足於人不失色於人不失口於  
人夫是三者所以養素自重也學者果能守身如女  
子使不一有所失而交接之間又能動中禮法則不  
諂不瀆而官府見之亦自然起敬此滅明之持身所  
以深爲子游之取而宓子之治單父所以有事之而  
稟度者凡幾人也今諸賢抱道自高者固願見而不  
可得間有因私家細故輕至公門及至公門而猶

悻悻自好石均之於體貌不雅故願諸賢以道自重  
以禮處人其有政治得失切已事情必欲相聞者請  
於朔望日稍存提調諸生之分就於明倫堂對衆稟  
白則既無亢厲之態又無苟賤之羞志意舒展言語  
得盡而縣官亦自體悉矣

方山薛先生全集卷五十四

賦

石秀亭賦

有序

石秀亭者玉溪張公家食時作也公居蜀之內江內江迤東有山聳翠名曰三堆上多奇石公因亭焉以資靜修命曰石秀云武進顧生公門人也傳公之命屬賦斯亭某雖未之登雅聞其勝矣遂述而賦之其辭曰蜀於九域分曰梁丘仰瞻天文背參下流載觀方位井鬼揚休古爲蜀國漢置益州隋唐而下建守設侯沃野天府與壤名陬華陽黑水重阻雙流石門

劒閣岷嶓上游衣冠都會水陸咽喉雄藩巨鎮天下  
無公楊箴不能殫述左賦病於兼收余亦安能縷數  
姑摘其一二用闡斯亭之幽維此成都內江三堆突  
奕東浮翠聳芙蓉之渚秀凌華萼之樓紛巖崎於羣  
石繞臺榭以遭周礪礪磊砢硤硤礧礧礧礧礧  
礧礧硫礧礧礧礧礧礧礧礧礧礧礧礧礧礧若  
俯若仰載懸載浮笑緹葦於梧臺邁鐵劍於流洲壯  
麗俯石鯨於靈沼文章炫鶉郊於休牛肖像儼湘源  
之令史攘袂恍宜建之督郵熊渠疑伏虎而矢發武  
昌因盤龍而名留雩都金雞勝莫爲並永康黃鳥價



無與儔他如石傘石帆石簣石鷄石甕品峙石壁厲  
峭會稽名勝爭環競抱陰鏗難措於辭張正詎陳其  
巧聚秀鍾英翼然有亭簷阿翬蜚棟宇鳥驚焚燎沃  
彩櫺檻麗明重關深靚崇險夷平簾櫳霞起堦砌雲  
生松筠倚徙而流翠芝蕙窈窕而敷芬時有飛花入  
研瑞靄蒸文冬不凄寒夏無炎暉瑰琦充溢古雅具  
陳青萍繡鞞朱絲錦盛漢譜宋刻騰輝燿精琅函犀  
軸今昔著稱陳玄端紫管城剡藤後先左右郁郁紛  
紛爰有主人長晝未闔乎孫扉董帷清夜而燃檠形  
陶頽乎鄴架心涵泳兮至情聖者作而明者述數有

圖而理有經撰著上窺乎姚姒俯先秦而陋兩京積  
厚斯發畜極攸行雲蒸虎變連茹彙征講筵詞掖籍  
籍馳聞量材較藝設矩縣衡青陽桃李濟濟舄衿格  
心華國天下仰成揆經綸於伊始聿有感乎斯亭若  
乃載酒合江浣花樂俗會勝房湖浮觴廣莫疇昔侈  
乎佳名今茲邁其芳躅盖寔天作而地成造物寔司  
於幽獨詠嵩嶽於周詩喟申甫之相續維蜀山川毓  
秀孕靈渾淪磅礴萃於人文蔚若相如嚼若君平王  
褒韓曄而秀發楊雄含章而挺生孔明輔漢而盡瘁  
令伯報劉而陳情李白感長庚以迅邁三蘇鍾眉山

而擅名遙瞻石秀慚我後生緬懷才賢俯仰古今慨  
往哲之不作羨斯文之有人亂曰維山崔嵬石效珍  
兮發秀吐榮團祥氛兮維亭穹崇哲人棲兮虎豹炳  
蔚光陸離兮簷楹逼斗星文閃兮寰宇嚮風圖書闡  
兮茲山茲亭末無極兮

牡丹賦

代管副憲作

鉅野府中牡丹盛開余觀而樂之爲作賦曰伊嘉卉  
之足珍兮爰託居乎紫庭羨金玉之枝葉兮若相輝  
而與京仰華宇而盤旋兮依嚮明之雕楹夾迴廊而  
駢羅兮周迎風之曲亭覆青鋪之碯砌兮映碧疏之

綺襦漾朱鏤之文檻兮昭素箔之瑩晶培濡澤於密  
液兮挹玉漢之玄精灌脂水於阿房兮漱華池之流  
清適條風之應律兮胥協氣而綢緼泯剪製於天工  
兮屬造化於陶鈞俄苦蕾之含暉兮綴翠枝之列星  
挹宵零以舒采兮發窈窕之殊英熏晨曦而噓艷兮  
逾綽約而光明左紫練青赤於神女兮韉紅織雲錦  
於天孫朱砂轉九鍊而傾鼎兮玉板經兩削而破荆  
鶴翎蒙茸而縞素兮金粉團聚而鮮新楊妃春睡於  
玉樓兮西施若笑而若顰奇形異種不能以縷數兮  
恍鬬巧而爭衡爾其徘徊以周覽兮不覺目炫而心

驚顧高枝之方獻兮轉疊萼之隨擎盼垂條之廻繞  
兮憐纖藻之輕盈紛冉冉以陸離兮追度索之玉衡  
更煒煒而曄曜兮嗣崑崙之若英蘇賀垂芳於藝圃  
兮姚魏緣之而著稱茲真洛陽之麗藻兮洵非於越  
之舜英惜雅什之未載兮致騷人之失名披歌吟於  
李白兮豈其錦繡之足形賡諷詠於蘇子兮亦非瑪  
瑙之可評忻來叔之彙譜兮庶觀物者之可憑何堯  
夫之先見兮識零落於方榮矧青春之易邁兮柰白  
日之遄征嗟人生之留戀兮疇克過目而忘情聊酌  
瓊蘇以酹神兮願奕葉之相承惟主人之慎護持兮

斯永莫乎厥生

方山薛先生全集卷五十五

詩

四言古

七子詠

并序

七子者建安才子也閑于詞賦爲時所推  
獨其學不知本溺於風流乃若名節自勵  
吾差有取於偉長耳嗚呼才之難也余蓋  
憐之爲作七子詠

曹植子建

翩翩公子曄曄英才侯封數易罹此疑猜放情燕樂

幽意徘徊矯志責躬五遊七哀沉憂寄興鬱鬱而摧  
富貴逼人孰與草萊

王粲仲宣

嗟爾祖父爲漢三公生此多才爲世詞宗奈何不辰  
遭此鞠凶秦川板蕩家廢途窮往依劉表無如蔡邕  
登樓作賦歸心有忡

徐幹偉長

古今文人不矜細行建安才子偉哉徐生清玄體道  
遺世辭榮箕山雅志潁陽高情懷文抱質器度渾成  
中論昭垂大義以明



陳琳孔璋

漢當末造炎運流離董生倡亂袁氏乘危進退維谷  
去就踟躕本初書記聊爾羈縻晚歸孟德章表四馳  
颺騰波流名播一時

阮瑀元瑜

少有異質受學中郎曹洪辟召辭疾而亡遭遇魏公  
軍謀贊襄才優記室策馬成章一時書檄藻麗鏗鏘  
渤海脫迹河曲翺翔

應瑒德璉

汝穎奇士家學流傳卓哉有斐星雲粲然逢時多故

漂泊述遭曹公歛才招致帳前心懷述作忽忽遷延  
惜竟不遂齋志以捐

劉楨公幹

殊才卓犖逸氣縱橫振藻海隅莫之與京鄴宮游燕  
傲睨羣英彼美孟軻顏色輕盈乃獨平視以罹于刑  
豈其信古滅燭絕纓

短歌行

白日西沒皓月東盈盛年難駐榮華易傾有酒在尊  
有殽在俎式歌且舞爰樂我所憶我生時蓬矢桑弧  
壯遊四方神悴形枯博物洽聞結交如雲萍漂星散

枉用殷勤貞心雅志達道行義滄海易變河清難俟  
秋燕春鴻物候不同殊情異感各適所從卓彼鷺鳥  
栖息艾蕭奮翼天衢閭闔迢遙嗟古英豪爭名矜勞  
忍捐三命殉此二桃

獨飲

穆穆玄冬濛濛微霰孤旅幽居值茲歲宴仰盼庭柯  
栖鳥知倦嗟我征夫亦又何羨欲歸未能中心展轉  
獨飲不醉聊以自遣

偶書

顏回陋巷王通敝廬哀哉五穀惜矣三閭

毘陵十六詠

并序

余家居簡出罕所交游每思鄉之前哲與  
郡邑守令之賢者恨不生同其時也高山  
景行余將疇依爲作毘陵十六詠

吳季子札

延陵季子吾鄉之特氣鍾一元道通三極見禮知政  
聞樂知德默造淵微不大聲色出其緒餘掛劒讓國

張子厚

塞

子厚高賢脫屣流俗進士謝官歸隱山谷窮經著書  
返我初服蹈中守常聖學攸屬季札風高踵其芳躅

楊龜山時

延平大儒龜山先生道傳伊洛僑寓昆陵十有八年  
講道橫經啓我邦人爲世儀刑余生也晚詎能忘情

鄒志完浩

偉哉忠公吾邦之良受學程門尊禮游楊徃復論道  
日就月將謹獨二字佩服不忘諫謫新州歷變如常  
周伯忱孚先

君子有憂未免鄉人學者大患在失所親卓哉周子  
邁俗超塵遠趨河洛程門是詢聖在路口唯恐迷津

周伯溫恭先

伯忱仲氏是謂伯溫從兄遠游同謁程門篤信好學  
懇切討論拳拳服膺成性存存恬於進取爲世推尊

唐彥思

棟

陽羨山中彥思最賢二周合志同事伊川克已復禮  
切問精研推演師說纂次成編昌明吾道闡發真傳

鄒德久

柄

孝哉鄒子克承家學莊外敏中剛鯁卓犖師事龜山  
更加追琢布衣膺薦侍從帷幄昭雪父冤典禮優渥

喻子才

樗

龜山高弟遷居錫山學宗伊洛啓鑰抽關紹興多事

國有權姦力主正論立懦廉頑多所識拔共濟時艱

胡德輝

理

龜山門下羣士切磋有如德輝所得爲多究極精微  
辨析差讹再謁元城猶恐偏陂護道有錄末世不磨

尤延之

袤

錫有延之受學玉泉龜山奧指盡得其傳誨經訂古  
洞達真詮立朝抗論天子悚然完名全節沒世稱賢

李元德

祥

錫有元德延之門人淵源一派嚆噤道真歷官清華  
願爲外臣及掌國學表正人倫允矣師模爲世所珍

蔣良貴 重珍

良貴問學純粹而精發自延之龜山二程本心外物  
界限分明積誠寤主恬退居貞及第第一不愧科名

黃商伯 潁南康都昌人

卓犖襟懷神清氣勇講論精密考亭所重來知常州  
惠政種種黨禁方嚴謫居不恐載出載處不驚辱寵

石子重 嘉台州臨海人

外和內剛平居恂恂讀書談道尚質任真著爲心說  
默識靜存考亭討論毫釐具陳知我武進澤被斯民

王子正 遇漳州龍溪人



嗟哉王君一代之雄潛心道閫涵泳從容泊然名利  
浮雲太空篤信務實見推晦翁知我常州興起士風  
六言古

德慶山房春暮四首

山徑春深草沒禪堂晝永花飛懶向侯門扣角蕭然  
獨被荷衣

乳燕雙飛欲墜新蕉半卷將舒孤客忘言獨坐幽懷  
空自躊躇

嘉樹繁陰蒼鬱脩篁解籜離披昨夜三更雨過今朝  
霽色淋漓

寂寂山村犢卧陰陰桑柘鳩啼館僕不閒農事汲泉  
唯灌瓜畦

玉蘭花開風雨大作

素質自成殊品清芬不類凡花元是天工造物何爲  
風雨交加

偶作二首

一室纖塵不到四時總是陽春自可延年度日何須  
海上仙人

池上閒觀魚躍林間靜聽禽言誰謂光陰迅速一日  
長如一年

人言

人言讀書辛苦此中至樂誰知日與古人相對千年如共一時

長日

長日北牕高卧曾中百慮消除自是羲黃上人元非晝寢宰予

牡丹

滿砌牡丹花發攜尊一挹芬芳盡是玉樓春色何須魏紫姚黃

觀筍

雨過春林笋透高高下下參差一見分明玉立臨池  
影落漣漪

留客

池上鴛鴦出沒階前芍藥芳非正值綠陰初夏嘉賓  
且莫言歸

五言排律

同諸友登上方山

聯袂石湖濱驅車上方路涼飈暢幽懷淡月照良晤  
翠黛鬱青葱白練浮輕素嘉樹逞華姿豐草承湛露  
長條拂菌閣密葉隱蓬戶鳴榔起山麓吹笛自村塢

荆豔奏陽春吳歌發遲暮寶劍泣長蛟金丸走寒鬼  
夷猶隨所之倚徙閒余步願追舞雩游懶作南昌賦  
煌煌京洛行

京洛何煌煌中興景運昌鉤陳躋帝座樞輔映文昌  
西北重關險東南沃野長奧區迴複道隆阜繞巖廊  
樓櫓千層壯牙旗五色章宮庭浮紫翠殿寢鬱青蒼  
仙觀翔鳩鵲靈臺集鳳皇園丘陳樂舞泰時薦馨香  
職貢通諸國歸王合八荒璇題標貴戚玉珮識侯王  
招選開東閣傳宣出上方侍臣聯鵠立俊士列鴈行  
賜燕歸長樂承恩度未央昆明觀水戰蓬島聽雲簧

喜躍聞嵩祝歡呼詠栢梁千門傳盛事萬戶頌休光  
猶阻揚雄賦空嗟貌不揚

朝罷出東角門恭遇 駕幸文華退而感賦

丹闕朝初散趨蹌出殿廷鳴鞭流逸響奏樂遶餘聽  
旭日晞朝露晴霞澹曙星傳宣驅虎衛辟易擁龍亭  
金甲陽光閃銀盃雪色淡仗移開寶扇旂轉應和鈴  
左順瓊花碧東曹芝草青從臣遙捧牒侍史近橫經  
共獻危微旨咸陳戶牖銘地天欣遇泰堂陞喜忘形  
自顧慚庸陋官階限掖庭無緣窺講幄空此仰威靈  
同董海鹽林秀水游靈隱寺

野曠秋容麗山空灝氣浮雲開天竺樹日抱越江流  
鳬舄攜仙侶鸞輿狎貴游丹楓明玉劒黃蘗照文裘  
飛壑疑奔浪懸崖欲墮樓龍宮含藻井鷲嶺逼丹丘  
斷刻書文沒危崖色相留藥欄燈影落竹院磬聲幽  
炊黍開香積烹泉瀹茗甌松風時隱籟澗雨忽生漚  
不盡塵沙劫空憐草木籌無生真妙悟長嘯寄蜉蝣

送徐少湖宮洗

黃閣儲真宰青宮屬上才絲綸嚴覆選章疏競先推  
俞命宸衷眷徵書勅使來已知睽巷遇咸喜舜門開  
元是瀛洲客還登玉署臺賢聲馳五嶽文采動三台

金珮昭殊寵緋衣麗特裁周官修羽籥商鼎作鹽梅  
抗法隆師道包蒙養聖胎獨憐南國士悵望日徘徊

七言排律

次韻送吳筠泉掌南翰

南臺鳳去屬誰游此日君歸白鷺洲石室編摩凡幾  
易玉亭名姓孰爲優試看歷代圖猶在可惜諸司誌  
未修欲令馬遷終著述且教吳兢暫淹留豪華自昔  
爭傳勝凋敝何人浪詠秋風雅近來多散逸願抽史  
筆一時收

閒中偶成



晝長無事比窗眠始信閒中別有天世路浮華何足  
論人生泡影不須憐插籬種竹方成圃甃石爲山欲  
引泉學奕未諳先後著著書聊續古今編林間每過  
談玄客門外時停問字船野菜煮來供酒酌山花摘  
下和茶煎自言寰海應無我誰說蓬萊更有仙歲月  
推遷渾忘却短衣疎散日頽然

方山薛先生全集卷五十六

詩

長短句

臨高臺

臨高臺望天闔咫尺宛在雲中央  
駕黃鵠乘青鸞紫霄碧漢何盤盤  
攜赤松拉王喬遨遊廣漠真逍遙  
襲霞綺餐星芝元化周流忘日時  
鳴雲和吹玉笙曲中嫋嫋昇天行  
弭絳節停朱櫓眷言桑梓歸丘樊  
嗟人生真浮漚百川東注難西流  
任窮達憑有無勞心遠想胡爲乎

君馬黃

君馬黃臣馬黑二馬同驅臣馬逼君馬德臣馬力按轡徐行控銜勒君當尊臣當卑與君相並終當危

哀王孫

昔淮陰韓信家貧釣城下漂母飯信信曰吾必重報母母曰吾哀王孫而進食豈望報乎旣信輔漢封侯報漂母以千金茲余過信祠感而作此

哀王孫餽壺飧恤貧不望恩漂母雖女流慷慨真足論豈知王孫可哀不在貧乃在功成名遂富貴場中

不乞身千金酬一飯豈忍負君親哀王孫難重陳

### 北固山

北固山楊子江江頭峰巘山麓水淙淙眼前此景  
真絕竒登臨忽忽動遐思風煙一息千萬狀今古游  
人豈盡知

### 太虛草堂歌

太虛中莫可窺四方上下不知其幾千萬里空空洞  
洞杳莫窮其所之山河大地總幻形造化萬物真小  
兒白衣蒼狗斯須變有無無有相推移我獨何爲築  
草堂蜉蝣蝸角同棲遲只有天君常太然浩蕩廓落

無爲無思青天白日光風霽月朝朝暮暮會合不須  
期疾雷閃電那恐喝祁寒暑雨何嗟咨曾登廣寒殿  
曾入承明廬凌虛厲空渺河漢誠然玉帝仙人居柰  
何魑魅罔兩亦潛伏不免進退俯仰還躊躇自謂此  
堂雖草蓋蕭條寂寞終無害不與城市隣亦鮮衣冠  
會草樹煙花種種憑代謝四無人聲唯聽松風竹吹  
鳴天籟舊藏古今人文牘有千萬卷間中一展聊以  
開愚昧追思昔年何意漫浪游天南塞北經涉萬里  
將何求慙直不曉世途事樂人之樂憂人憂轉喉觸  
諱那得知吐出曾臆無纖留幾迴逢怒幾遭下石幸

而得全性命歸林丘始知今居此堂不易得獨寐寤  
歌堪偃息

夢覺歌

晝長如年無一事高卧北牕聊假寐夢中忽至瀛海  
東波濤萬丈天爲清中有一葉蓮花舟舟人盡被紫  
霞裘舉手揖我笑相向謂我不是世上凡庸流可即  
登舟去夷險無足愁我初恍惚亦起疑旣見魚龍出  
沒左右夾輔成安流頃之忽到三神山瓊臺玉宇琪  
花瑤草非塵寰不用排雲叫閭闔霓旌霞蓋分明只  
尺即天關造天關聞人語濟濟衣冠類鍾呂進問玉

童前班諸老更爲誰笑而不答投片楮上有書篆雲  
朦朧再三檢閱姓名一二差能通乃知廣成子浮丘  
公老聃及彭篋王喬與赤松古來列仙皆在中設精  
饌張華宴金漿玉液交相薦碧落磬雲和笙鈞天廣  
樂一齊鳴祥雲捧月海底來珠樓貝闕咸爲開俄似  
銅壺催曉籌翠娥舞罷爭獻酬酒酣我起問歸路羣  
仙指言弱水西頭應有渡別時解劒贈我壯行色出  
門不遠忽然寤寤來感此夢亦奇可惜此身還復故  
昔人亦有南柯夢黃梁炊未熟富貴升沉幾變動因  
悟世事無足爲幡然遂入仙人洞任汝逍遙天地間

總是蜚螻在鉗甕從今看破幾千百年亦瞬息夢即  
覺覺即夢富貴神仙俱戲弄眼前紛紛輕薄兒朱輪  
華轂爭交馳仙人猶且不能遑胡不低頭一致思君  
不見蘇秦六國誇金印霍氏一門登赤墀方張烈焰  
即灰寒甚至族屬無纖遺何況聞雞走狗輩自矜豪  
俠將何施我今夢覺發浩歌人方昏睡柰爾何

詞調

尉氏公館次元人水調歌頭

洛陽好歸路正值仲春天滿前游絲花柳隨傍過伊  
川尉氏經過官舍偶見元人詞調信口和成篇孤坐



夜將闌明月起山顛悄無人相對語有誰憐因思夙  
昔尚友欲並古諸賢今幸初心無負往事何須說起  
直是下帷眠到處可行樂久矣悟真玄

附元人尤顏思忠招隱詞

白雲渺何許目斷楚江天省風大河南北跋跣幾山  
川手線征衫塵暗鴈足帛書天濶恨入短長篇青鏡  
曉慵看華髮早盈顛歎流光真逝水自堪憐明年屈  
指半百勲業愧前賢霄漢驟鸞無夢桑梓歸耕有計  
醉且付高眠寄謝鹿門老待我共談玄

方山薛先生全集卷五十七

詩

五言古

雜詩二首

憶昔有二士，慇懃結金蘭。自托松與栢，永矢凌歲寒。  
詎謂殊所遇，貴賤旋改觀。一爲乘車客，致身青雲端。  
一爲戴笠夫，抱膝泥中蟠。邂逅兩相值，意氣殊未安。  
貴客恐憑藉，賤夫甘孤單。束髮把袂約，白首按劒看。  
人情自如此，諒哉結交難。

西鄰有二女，皎皎瑤華姿。日夕理刺繡，姊妹相追隨。

有時各對鏡交爲修娥眉耻學趙飛燕不作邯鄲姬  
忽乘桃夭會媒氏問所宜夫婿年尚穉少女先結縈  
翟裼映衢路爭看九十儀長女悵岑寂惻惻轉成悲  
羞澁不能語空閨垂涕洟匪急燕婉好祇恐嫁失時  
少女忽遭譴歸來長歎咨采蠶療鬱結因賦谷風詩  
願姊慎所適十年勿較遲

選貢北上途中雜詠二十四首

青陽麗淑景羣芳競開發聯翩遊冶郎相攜出華閨  
我獨栖傳郵卧病懶櫛髮開鏡臨軒窓峻嶒見瘦骨  
著書千萬言擬欲獻丹闕薄命不逢時登徒屢遭蹶

惻惻嗟卞和抱玉屢經刖欲行忽復暮悲傷增恍惚  
一日九迴腸悠悠對孤月匪敢慕繁華景光易銷歇

二

相知不用蚤相見不用頻同舟遇風波胡越皆相親  
氣勢無可倚故舊不如新自昔稱友道恒羨雷與陳  
當時未深信謂世更有人乃今稍涉歷二子誠出倫  
巨源當啓事叔夜甘賤貧伐木久已廢睠焉傷我神

三

皎皎長河明末夜輒忘寐中心有所思忽忽未能寘  
把酒聊自斟獨飲不成醉人世多賢豪我生本不類

六籍空沉酣詎免章句累嗟嗟班仲叔傭書以供食  
惜哉楊子雲投閣竟何事藜藿聊自充衡門謝結駟  
寧與燕雀翔齋此鴻鵠志莫做繽紛徒繁華有憔悴

四

平生耽寂寞唯愛山中居山靜日偏永草色侵庭除  
獨坐無知音默默意自如通玄會衆妙觀物知盈虛  
形骸果何物仁義真遽廬流浪大化內無終亦無初  
胡爲苦不足日夕空歛歔

五

今夕竟何夕仰見參與辰駕言遠行邁奄忽離所親

悠悠望燕趙燕趙多風塵握瑜被短褐馳逐良苦辛  
豈無弧矢志茲情難重陳

六

山中住已久蘿桂殊有情春來衆芳發好鳥相和鳴  
二三同心友頻過無送迎架上書不束尊中酒常盈  
鼓琴復鼓瑟清風吹我纓如何涉長道祇令懷抱縈

七

三十奄鄉土茲將客他方可憐抱墳策屢蹶宏詞場  
聊膺三舍選壯志猶未揚學臺惜我屈朋友嗤我狂  
我心總自適征途逞慨慷過沛歌大風涉魯賦靈光

振衣一聳目泰岱鬱青蒼吾道本自足奚必悲行藏

八

世業值中落兄弟俱自營我忝仲子行三十名未成  
季弟蚤夭歿宿草覆孤坐追悼未靡及傷心淚縱橫  
彷徨陸機泣楚惻潘岳情況復在原野愁聽脊令鳴  
萬類俱相倚何獨偏羸羸

九

原野風蕭蕭黃沙蔽車軌薄暮多黑雲道旁見白骨  
試問行路人云是從征卒前年戍朔方去年備回紇  
離家一萬里勞苦誰爲恤况復經三年衣糧俱罄竭

饑寒莫能支歸途就茲歿聞之益慘悽荒郊暈明月

十

相知方苦遲相別一何早分袂忽經時愁生江上草  
望之不可見川塗莽榛潦今夕復何夕鬱鬱牽懷抱  
我生本孤寒朴拙寡所歡種菽僅充食荷衣常不完  
感君慇懃意謂我世所難傾蓋要白首持贈青琅玕

十一

驅車涉層丘望望生離愁親庭漸以遠縹緲孤雲流  
方春辭膝下倏忽逢初夏念子遠行游庶幾保夙夜  
茲辰在何方想像出高唐高唐多善歌歌聲偏激昂



願子慎服食勿因增感傷

十二

明月照客房徘徊更延佇言念閨中人綰衣方獨處  
晨興奉菽水并曰忘辛楚黃昏宜即安孤燈照機杼  
嗟我良人行乃今在何許出門恰春寒奄忽交徂暑  
應脫黑貂裘無由寄白苧願言早旋歸庶免爲羈旅

十三

知音不易逢相逢不易容掖庭忌國色都市厭厚封  
矧茲才藝徒各期世所宗千金享敝帚疇肯相服從  
孟堅嗤武仲唯恐追吾蹤陳思排孔璋俾之避其鋒

金玉有定價驥駟各奮庸嗟爾同袍士胡不恢心

十四

進前每不御聞聲多相思貴耳偏賤目厭常必好奇  
人情大率爾新知易故知言念同門友意氣蚤相期  
脩文論道術窮極窺黃羲一朝策高足揚眉居九達  
殊方多俊逸結納恐後時我行當自遜未必棄如遺

十五

微軀苦塵寰遐思奮六翮凌風翔紫霄直排太微掖  
羣仙啓瓊扉神皇授玉冊侑以丹霞衣兼之白雲舄  
漱以沆瀣漿加之零露液吹笙引涼颼晞髮倚青壁

夷猶任所之長與俗人隔

十六

長途麗白日垂楊映青樓上有彈箏女歌聲入雲流  
睠茲遠游客朱簾半上鈎纖手持芍藥臨窗若欲投  
顧盼目不成舉扇旋掩羞忽爾自歎息託身非良謀  
諒哉各有心沒溺將誰尤

十七

玉匣有二劒沉埋幾春秋神物終難泯寒光射斗牛  
可以麾三軍可以匡諸侯得之不能用分飛吳楚流

十八

壯士久從征軍中多苦情寒衣猶未寄風雪暗長城  
昨緩防秋令權辭都護營創傷成痼疾歸路不能行  
祇願還鄉歿不望還鄉生迢迢萬里道誰恤此孤孑  
旅懷聞感愴何用戀微名

十九

北風吹白楊瞻彼此邨上塚墓莽荆榛莫識何時塋  
荒涼土一丘賢愚總流浪今古何茫茫乾坤真浩蕩  
達士貴大觀人生皆幻妄

二十

驅馬適長安方知行路難空村煙火少日晏始朝餐

往來多俠客相逢按劍看離家未踰月歸思逐江干

二十一

孟夏雨新霽晨起日正昕都城遙在望鬱鬱采霞文  
車馬競前進聊喜息塵氛倏忽東風急山川俱出雲  
陰晴猶未定側聽雷聲殷停驂酒旗市黯慘落日曛  
行止諒有數遲速安足云

二十二

農人墾蕪穢種菽趁新晴觸我山中興復動灌園情  
苜蓿經春長葵蒿方向榮小池通曲徑抱甕時自行  
即當返初服悠悠度此生

二十三

北地恒苦寒頃值溫風時豈無棄繻心戀茲一敝帷  
自知難遇合聊爾漫相隨計日數歸程新秋以爲期  
嗟彼叩角歌銜鬻將何爲

二十四

乳燕逐羣飛翩翩繞征衣游子感物候中心切瞻依  
不辭行役苦但恨音信稀矧茲平生志淪落與時違  
本無王事殷四牡空駢駢

邯鄲才人嫁爲廩養卒婦

妾傍叢臺住顏色耀里閭十三調琴瑟十四學詩書

召入長門裏。珮玉鳴瓊琚。輕盈對秋月。娥眉勝蟾蜍。  
不見君王面。含情歸敝廬。刈芻邯鄲道。脉脉空躊躇。

關山月

重關一百二。迢遞雪山高。萬里秋空月。寒光照鐵袍。  
匈奴猶未滅。晝夜佩弓刀。苦憶家鄉遠。寧能知我勞。  
征衣何日寄。轉戰出臨洮。對此孤栖影。忍聽風怒號。

贈別歐陽曰大

與子欣相覲。倏爾言別離。長江隔左右。把袂訂心期。  
大道鬱荒楚。平原蒙蒺藜。願言各努力。遲迴欲待誰。  
長安多少年。錯落鳴新辭。弓裘照杯酒。日暮空嗟咨。

我本龔豪士，慚愧學同師。河梁望彌遠，撫心悲路岐。  
送胡刑部致仕

風帆下長淮，楊花白如霰。康侯返故廬，解組听夕宴。  
亭亭巖下松，琅琅青竹箭。柴桑賦歸來，感茲飛鳥倦。  
東山有高卧，委適良自便。人生百年會，光華疾於電。  
俯仰酬平生，林臯足游衍。

前川四景

杜若芳洲

淺淺河中洲，青青洲畔若。敷芬鬱陸離，迴波浮綽約。  
逐陰沙鳥飛，滄馥鱗魚躍。有美者誰子，輕舟泛瀟灑。



石鐘山記  
八  
逞茲春色妍玩之聊自樂陋彼溱與洧相贈空芍藥  
垂楊晚泊

長流拖素練柔條懸碧絲返照徹深淨光景明漣漪  
停檣維錦纜忽爾涼風吹人皆苦炎熱葭葦寒離離  
清陰落杯酒漁歌起前涯謾弄桓伊笛聊寄淵明居

松臯引鶴

玄鶴鼓脩翰乘風逝寥廓秋原霜露凄草木盡零落  
廻翔載轉旋欲止靡所着亭亭川上松青青更沃若  
抗跡凌高虛長鳴振林薄對此懷昔人邈矣漢陽閣

松濤響翠

長風起天末逢逢行太空觸物盡披靡喬松鬱青葱  
感之自成聲銀漢傾鴻濛嚴寒萬籟滅唯此鳴窮冬  
所以賢達人屬耳官商通忉怛莫我知誰爲空谷筇

黑馬篇

余觀政工曹乘黑馬出入感而賦此

朝騎黑馬出暮騎黑馬入盤旋都市紛颯杳黃塵襲  
色謝雲錦文俯首就維繫摧秣恒不辰毛踈骨逾立  
况復霖潦時泥塗恣沾濕昨出經天閑遲廻轉羞澁  
驅策弗欲前愧茲織離集金鏤揚玉鑾聯翩自和戢  
種類誇余吾渥洼任呼吸一從貳師歸銀黃授上級

風電倏揮霍追隨不知急長驅斬骨都奮鬣征馬邑  
再上祁連山峻嶒逞旋習黑馬爾何爲長嘶欲於悞

擬古十九首

人生百年內聚少離偏多茲辰與君別我懷當如何  
芳華易銷歇歡會恒蹉跎秋燕辭故巢春鴻度交河  
望望不可見悠悠難自遣寒氣忽蕭森嚴風下霜霰  
征人涉長道中心徒眷戀願言保堅貞勿因時序變

二

天天萋楚枝霏霏楊白花翩翩行路人紛紛逐輕車  
揚揚自誇詡汎汎落誰家昔爲三輔豪今爲五陵客

五陵皆貴游施與輕金帛

三

南山何巍巍北海何浩浩光陰瞬息間人生若流潦  
烹鮮日舉觴爲歡苦不早駕言適都市馳逐紅塵裏  
比次飾華閭輝煌多戚里結交卿與相章服紛朱紫  
遨遊逞意態日昃歌鐘起永夜復達旦咨嗟者誰子

四

邂逅集儔侶良辰喜合併慙勤具旨酒鼓瑟復吹笙  
酒酣拔劍舞慷慨有餘情雕梁語乳燕灌木鳴春鶯  
物各有所託人須樂此生華要未可得自適疇與爭

胡爲甘局促役役撓其貞

五

城闕何崔嵬掩映青冥端樓櫓簇飛甍天陰風色寒  
忽聞鐘鼓鳴長夜何漫漫夜長何時旦叩角聲悲酸  
飯牛亦自足營營奚所干不忍負宿抱聊茲試一彈  
聞者忽相感誰謂知音難薦引不究用撫膺空長歎

六

上山採薜薇幽谷多蘭茝采采盈襟裾將以貽君子  
君子天一方道遠室徒邇瞻望結遐思悠悠靡所止

七

月華照清夜  
螻蛄鳴砌石  
虛柳昏正中  
秋光漸蕭索  
風淒草樹枯  
時序何促迫  
烏鵲向南飛  
鴻鴈傷離陌  
言念二三友  
聯裾入左掖  
同升不同遇  
中外遂睽隔  
新知且易乖  
要能不易旅  
懷多感愴  
究竟皆塵迹

八

翩翩雙鳳皇  
文采耀羽翰  
和鳴向旭日  
雄雌協所歡  
中道忽分散  
衢路何漫漫  
雲霓杳無際  
日夕成孤單  
離合不足異  
會合應艱難  
傷彼美孟姬  
灼灼春花姿  
待得旋歸日  
容顏非昔時

九

空谷有幽蘭寂寂揚清芬不忍自怡悅將以持贈君  
君行萬里外望望隔青雲含情未得達佇想空慇懃

十

東方升啓明西方下長庚南方箕欲沒北方斗將橫  
衆星散以落林梢烏鳴鳴披衣起獨坐惻惻萬感并  
美人在咫尺幽懷未能傾

十一

策馬出街衢將歷九達道絡絲整銜勒馳驅還自保  
灼灼園中花青青原上草顏色媚春陽誰不羨美好  
忽焉霜露零凋枯就傾倒人生莫虛度建立須應早

十二

層城何巍巍垣墉鬱相望秋風鳴樹間落葉旋飄蕩  
物候易推遷年光若流浪小宛惜征邁大東嗟饋餉  
適情且逍遙何爲苦相向長安多美人朱顏方少壯  
明珠飾翠翹高髻宮粧樣羅袖拂朱絲當窗發清唱  
聲響遏流雲詞調多悲愴願爲雙黃鵠飛集君池上

十三

出游東郭門遙望江南路楊花滿溪水曾送故人渡  
岐路不忍分旋車已薄暮蕭蕭風色寒曠野見丘墓  
故人去云遠獨行屢回顧生離與死別茲情良共苦



人生幻化中乾坤盡流寓誰能長壽考誰能長會晤  
仙人不可求飲酒聊自娛

十四

往者不可作來者猶可爲側視北邙山荒塚何纍纍  
牧兒尋亡羊耕夫事鋤犁前人即後人能勿生歎咨  
何由歸故園度日且游嬉

十五

人生本無幾憂思常苦多三萬六千日百年亦易過  
何不日歡會何不日笑歌積金至萬斛究竟還銷磨  
局促空自累奈此光陰何

十六

歲宴偏蕭索，鳴鴻聲正悲。空庭下霜霰，良人在天涯。  
征衣苦單薄，欲寄將貽誰？角枕與錦衾，獨處空懷思。  
願言早旋歸，日夕慰我私。對鏡理膏沐，常恐顏色衰。  
瞻望靡所及，愁心唯自知。服馬將何適？駕車將何之？  
山川悵悠遠，庶免渴與饑。徘徊增感傷，灑淚沾裳帷。

十七

孟秋陰氣生，涼風自空谷。夜來百感生，繁星正聯屬。  
攬衣起獨坐，掀帷方秉燭。客從遠方來，遺我書一束。  
誨我當慨慷，慰我無局促。置前再三看，詞旨多委曲。

我心良不移感君更忠告

十八

客從遠方來遺我綠綺琴相思不相見故人良有心  
金徽繫玉軫朱絃白雪吟一彈再三歎萬里感知音  
衷情不能語默默故難任

十九

東方明月出清光照軒窗對之有餘懷起坐披衣裳  
致身雖有托初志尚渺茫誰可與語此中心但自藏  
佳人未能晤何以慰離腸

上之回

法駕幸回中旂常蔽遠空前驅紛百辟後騎擁三公  
帳殿飈衝霧轅門氣吐虹詞臣傳羽檄武士挽琱弓  
雪色容刀白陽光韎韐紅匈奴應遠遁萬乘自臨戎

芳樹

庭中有芳樹結根傍幽軒對此終日夕扶疎應可憐  
大本不擁腫小枝不曲拳幸不逢匠石庶以全天年

巫山高

巫山高淮水深山高多限隔水深易浮沉征人涉遠  
道懷鄉無信音望望來時路悠悠傷我心何時罷行  
役一鼓雍門琴

折楊柳

年年楊柳綠遊冶逐芳羣今日關河道那堪折贈君  
相逢行

人貴相知心不貴相逢早心苟不相知相逢祇煩惱  
夷吾遇叔牙歷歷傾懷抱元伯夢巨卿終身敦宿好  
末世利交興奔趨忘古道對面隔九疑把臂成蠻獠  
所以耿介士獨立甘枯槁寧與麋鹿羣優游以終老  
雜體詩二十首

余性拙寡諧不便酬應觀政退食杜門獨  
居翻閱經籍因及詞人隨意擬作聊以永

日非欲如江文通之徧體諸家也

蘇子卿別李陵

武

孤踪淹異域與子獨相聞諒非水草性寧堪羊馬羣  
重念同袍士夙昔結慇懃我當持使節子復將三軍  
本期各努力慷慨立功勲風波駭非意淪落逐胡氛  
奄忽歲云易俛仰唯自殷今夕復何夕將歸謁漢君  
憐子苦獨沒相看不忍分淚噎莫能語徘徊沙塞雲

班婕妤詠扇

團扇新裁就皎如初月見素麗宛織羅光瑩凜霜霰  
清風向君懷煩暑自滌漙竊愁金氣應棄置不復眷

上畫雙黃鵠翻作孤飛燕

魏文帝遊宴

丕子桓

良辰屬佳麗游觀聊適情銅雀鬱勝槩華池涵太清  
卉木正萋楚禽鳥相和鳴芳筵登異品高會集羣英  
清歌協妙舞鼓瑟間吹笙擬騷卑楚調摘文薄漢京  
望遠嫌有際歡極悟無生曜靈忽西逝皓魄從東盈  
因茲感聚散人世徒營營

曹子建贈友

陳思王植

輕雲蔽白日颯爾涼風吹庭柯忽蕭瑟感之易成悲  
言念二三子結交在平時歡愛非浪與欲以同安

青蠅止榛棘讒巧亂妍媸恩情中道絕自顧空歎咨  
傾蓋已如故白頭翻可疑今辰集同志高誼胥夾持  
彈冠信不改挂劒酬心期申章敦宿好毋詠谷風詩

劉公幹感懷

文學楨

幽幽谷中蘭芬芬散清馥清馥何襲人采之不盈掬  
芳潔擬蘋藻氣味凌苜蓿獻作君王佩願言倚蒲穀  
過承優渥恩敢不自薰沐文學忝侍從馳翰慚金屋  
月出照園池翔翔陪輦轂微臣長歎息何以綏茲福

王仲宣懷德

侍中案

世路昔多阻馳驅多殷憂荒塗歷異域顛蹶趨遐陬



荆楚復漳湄江漢晨夕流山川浩無極逝者不可留  
願言慎所主忽忽將焉投寒露薄衰草淒風感衾裯  
少壯辭故國宛轉生離愁幸復際昇平荷蒙賢主收  
佩玉服朱紫歡娛結綢繆暮侍河曲宴朝從鄴城遊  
自非竭忠藎誰當享斯休所以古哲士死爲知己酬

嵇叔夜言志

中散康

余少失瞻恃受愛不知勞古訓未有獲氣志多自高  
鷲鳥恒不羣凌空振羽毛苦厭鷦鷯侶柰此鳴聲嘈  
翻飛謝雲漢歛翮潛蓬蒿虞羅徧寰宇頑疎庶能逃  
褊心任所向齋志且遊遨散髮卧巖岫采薇入林臯

養素堅守樸莊老真人豪抗心希往哲聲迹俱已韜  
得意旋忘言太音唯自操胡爲與世營膏火空煎熬

阮嗣宗詠懷

步兵籍

憶昔方青歲雅志敦詩書匪直甘近代將窺姚姒居  
出門覽廣遠游俠紛趑趄多從狹邪徑欵曲登玉除  
意氣何揚揚揮霍乘軒車榮名若朝露代謝還丘墟  
乃悟安期子飄翩任所如

張茂先離情

司空華

遨遊適郊野獨行旋復止曲徑轉逶迤叢生多蘭茝  
佳人天一方采之亦徒爾皎然春月明穆如清風起

我懷良感傷中夜空瞻企

潘安仁內顧

黃門岳

孤征有所思陟丘悵離陌雨絕麥苗青春暮楊花白  
郊野鬱葱龍沼泚含光澤去家雪載塗倏忽時序易  
迢迢道路長望望山川隔彼姝室中子寢興自晨夕  
想多饑渴懷時時念行役言歸未有期茲情曷能釋  
登城一舒寫目斷雲千尺

陸士衡赴洛

平原機

嗟身嬰世網登車陟修途悽惻辭堂室離腸難自割  
廣川多良友飲餞咸長吁攜手終當分願言留斯須

行行忽已遠南望空踟躕遺思纏百結顧影傷形孤  
佇立自慨歎揮淚盈襟襦寂寞聊偃息銜鬱仍朝但  
流雲薄高岑倦鳥棲枯株觸物易成感山川一何迂  
宦游豈不貴託身登要樞柰茲成羈旅辛苦疇與娛

左太冲招隱

記室思

我我山上石鬱鬱山下松願言同志士相與憩巖中  
誅茅結幽室蒼藤護簾櫳寒泉漱虛澗白雲停孤峯  
蘭蕙散芬馥竹樹蔭青葱薇蕨作饌糧晨夕足自供  
著書准道德妙悟窺鴻濛好惡不與聞俛仰無所營  
人生有嘉尚珪組何能榮

張景陽詠史

黃門協

漢家全盛日公卿被紫朱朝與金張游暮與許史俱  
一時幸無事朝野多歡娛二疏乞骸骨祖餞傾皇都  
人皆羨知止嘖嘖相傳呼逢萌挂冠去梅福歸東吳  
逍遙瀛海上謝却珥貂徒哀哉楊子雲草玄絕世無  
見幾苦不早美新空自污

劉越石贈盧諶

太尉琨

我生遘厄運軟弱不匡時獨居哀憤集空積忝離悲  
翹翹整車乘弓旌招所思小白復世讎重耳霸晉師  
諸賢各輔合戮力相驅馳自顧真菲薄何能致珍奇

中夜不遑寐撫枕空涕洟徘徊百憂至嗟哉日衰遲  
宜尼故有窮孤竹本長饑策勲負初志往者不可追  
寒風吹落英繁霜集枯枝軒車靡所逞素絲旋成緇  
時命不我與寸心還自持

盧子諒贈劉琨

侍郎謚

障川非一葦支廈非一木允資弘濟才更須梁棟畜  
蒿蘿施松柏乃與濫羣淑本以姻婭情休戚同骨肉  
伊昔邁嘉惠今茲無窮感悠悠思古人興言愿出宿  
伊陟永商祚山甫綿周祿孤偃與趙衰亡人因以復  
猥陋愧遐蹤子寔當樞軸謬承卞和盼燕石非荆璞

眷顧忝樂良駕馬方驥驤羈旅懷舊京眺望傷心目  
何以塞民望慰茲友朋屬

郭景純遊仙

弘農璞

石渠聯虎觀英俊多翺翔自謂神仙侶玉珮交鏗鏘  
孰與山谷士身穿薜荔裳卧起煙霞境呼吸瓊玉漿  
放情薄寥廓高蹈凌混茫丹經懸肘後終日自徜徉  
聊吹子晉笙漫舉安期觴蟬蛸徒楚羽舜華空芬芳

陶淵明叅軍

徵君潛

素性厭塵鞅琴書足自娛荷衣取蔽體炊黍刈生芻  
日夕任俛仰稚子憑歡呼一行作吏事園田遂荒蕪

盤旋曲阿側驅策陟泥塗遙遙千里去眇眇孤形徂  
中宵不遑寐歸思良鬱紆倦嬰軒冕榮甘爲山澤癯  
身逐浮雲去心與流水俱終當返故里聊以全吾軀

謝靈運齋中讀書

臨川

京華倦游觀石門聊偃息寂寞予雲廬棄捐左史職  
巖崖朝日暎池塘春草色屏氛自養疴時復戲翰墨  
流觀隨古今閒適憑寢食濯泉幽澗中披雲羣峯側  
詠歌擊壤謠夢寐羲黃域不願綰珪章無煩事稼穡  
庶以託此生欽懷聖賢則

顏延之夏夜

特進延年



屏居避炎暑羽扇驅游塵心星正當戶昏月暈車輪  
雲開漸流蘇仰見銀河津薰風薄庭木餘吹被綸巾  
鳴蟬聲嘒嘒螽斯羽詵詵荃蕙芬已委秋蟲動荆榛  
旋覺物候變隱東誰與陳

鮑明遠玩月

參軍照

曖曖懸城闕清光玉鉤橫漸漸薄帷幌斜暉團扇傾  
團扇微風發玉鉤澄露瑩每當弦望時憐君有虧盈  
盈則復生魄虧則復生明三五二八時相對應多情  
山川苦行役朝市厭逢迎公餘且休沐私居獨迴縈  
悽宛歌楚調激烈彈秦箏舉杯自停酌忽忽想遐

佳人在千里何時來合併

別諸同考

登山採良玉入海探明珠山石恒礧礧海水多沫濡  
高深不可極昕夕相躊躕白虹貫明月無乃委路衢  
吾非卞與象賴子開蒙眊胡爲忽分散各在天一隅  
蹊徑前險仄勿得輕馳驅况復霜露降服食慎所須  
蟋蟀詠勤苦山樞歌曳婁卑官足幽隱迤邐母嗟吁

飲馬長城窟行

飲馬長城窟胡天八月霜陰風吹絕徼將士鐵衣裳  
少小從軍旅鳴弦誇貫楊十年三出戰生縛右賢王

歸獻漢天子千門開未央捷書失名姓元功誰與將  
邊關事芻牧卑棲空自傷昨望盧龍月迢迢沙塞黃  
但願狼烽息青海波不揚呼韓款塞入契丹歸舊疆  
天閒卧龍種屯田餘稻粱投鞭日偃仰孤續永相忘

送尹汝光戶部

滔滔江水流皓皓江月白明星爛以黃睠茲玉墀客  
始出任苦辛今歸矢蕭索齊牧藐遺金宋人厭懷璧  
所以君子心居貞介于石嗟余羈旅人越歲同昕夕  
君懷我所欽我懷君每惜論道相慨慷觀化忘形迹  
把袂臨路岐豈爲愁離陌願各常厥居天涯共安宅

送高生美丞還南豐

送子涉長道驅車踐高丘晨曦耀若木輕陰蕩以浮  
元化屬真宰風霾旋自收河山任融結寥廓憑夷猶  
霜飛水漸涸木落驚深秋蕭條歲將改蒙茸貂鼠裘  
去去往何所涼月明中幃念予在淪落千里相爲謀  
昔汎章江渡今觀湓浦流百川浩歸海混混無時休  
此心妙真悟反身復何求少年多俠客離索勿輕憂

贈汪生叔明

憶子來潯陽陽春二三月念子歸新安歲暮衝飈發  
江頭理維舟戒行在奄忽洞庭揚楚波彭蠡胥出沒

浩蕩豁襟眸凌虛竦毛骨黃鵠千里飛迴翔弗能歇  
豈不憐羽翰所志在溟渤大澤固無涯未忍淪彭蠡  
嗟哉君子心對鏡傷黑髮黑髮有白時青暘莫虛越  
有美者誰子

有美者誰子結廬山之陽雲霞日縹緲草樹生夏涼  
巖扉常不閉綠澗自尚羊我欲徃從之誰謂道阻長  
願爲比翼鳥與之共翱翔

有美者誰子鼓楫河中流臨波弄清影垂綸無釣鉤  
冉冉芙蕖開芬芳足夷猶我欲徃從之誰謂道阻脩  
願爲比目魚與之共泳游

感遇十首

燥髮業文學博習多窮奇散漫罔歸束所向恒支離  
挾茲青睞侶獻策于明時三十未得意抱影守蓬茨  
一朝偶遭遇蹇拙衆所嗤進寸寧退尺忍茲迷路岐

二

農人居水鄉牧牛藉耕力偶爾獲麋鹿角觫始生息  
從來不入山與之未相識殷勤事芻秣謂將藝黍稷  
一朝服耒耜馳驅偶如式牽以蹊人田不從語以臆  
棄捐衢路旁犬羊競相逼願言歸豐林千年蒼白色

三

雄雞斷其尾香麝噬其臍豈不愛膚理思之良慘淒  
出入林莽間不向要路棲于人貌無害人亦不汝擠  
柰汝材足用有類象與犀所以古哲人姓字多沉迷

四

微軀苦奔役悄然思故居靜悟還丹訣閒看種樹書  
草木足充腹何必烹池魚芒屨足徒步何必巾柴車  
稚子散學館鄰翁息畝門前高柳下相對恒于于

五

女蘿寄松栢松栢有時摧蒼蠅附良驥驥足還自痿  
知己且莫恃恃之恐亦移長沙置前席淮陽恒避帷

嗟哉斯二人君心豈不知何况恩與私能免中路遺

六

腐草飛作螢貞女變爲石螢尚乘時熠石已任拋擲  
嗟乎不如草造物誠難譯大寒霜霰零候蟲旋滅迹  
貞精終弗渝光芒耀文碧周雅哀斯人况復爲虺蜴

七

涼風吹我襟明月照我帷鬱結隨風散幽隱托月知  
手書尺素箋將以遺所思所思在空谷矯矯松栢姿  
勁節凌霜雪清芬耀華滋寄言各努力永矢歲寒期

八



抱病日偃卧非隱亦非仕孤踪萬感集究竟將何事  
有客自遠方遺我數行字覽之復何言願結同心誼  
相攜歸去來人生真若寄鮮鮮木槿花敷榮寔堪媚  
楚楚蜉蝣羽光華儼如漬豈不亦自憐朝生夕還悴  
古來逞豪華歷歷皆可記何如草頭露思之垂涕泗

九

鵠雛適萬里竹實乃其食羣鳶擁腐鼠惟恐爲所得  
大鵬起南溟一鼓垂天翼相逢希有鳥遂爾自歛飭  
嗟鳶苦不知美茲鵬有識物情良不齊令人三歎息

十

平生慕真隱淪跡在塵寰徒御日往復此心聊自閒  
邂逅洞虛子賣藥城濠間綸巾白羽扇鶴骨夫容顏  
問之何從來云自終南山乃今住廬嶽深谷澗水灣  
門有長松樹煙霞常閉關終歲不火食遑知生事艱  
昨出試游行疲瘡聯闐闐崇朝不謀夕人命成草菅  
采芝復采朮我當從茲還